



CONVENIO COLABORACIÓN ENTRE A ADMINISTRACIÓN XERAL DA COMUNIDADE AUTÓNOMA DE GALICIA, A TRAVÉS DA CONSELLERÍA DE MEDIO AMBIENTE E ORDENACIÓN DO TERRITORIO E A CORPORACIÓN RADIO E TELEVISIÓN DE GALICIA, S.A.

Santiago de Compostela, 10 de marzo de 2016

REUNIDOS:

Dunha parte, Conselleira de Medio Ambiente e Ordenación do Territorio, nomeada para dito cargo polo Decreto 122/2015, de 4 de outubro, actuando en nome e representación da Xunta de Galicia, en virtude das facultades atribuídas no artigo 34 da Lei 1/1983, do 22 de febreiro, de normas reguladoras da Xunta e da súa presidencia, no Acordo do Consello da Xunta do 27 de marzo de 1991 (DOG do 30 de abril), e no Decreto 167/2015 polo que se establece a estrutura orgánica da Consellería de Medio Ambiente e Ordenación do Territorio.

Doutra a Corporación Radio e Televisión de Galicia, S.A. con enderezo social , inscrita no Rexistro Mercantil , C.I.F. A-15073349; representada neste acto por , director xeral da Corporación Radio e Televisión de Galicia, S.A., nomeado para o devandito cargo por Acordo de 4 de xaneiro de 2016 do Consello de Administración da Corporación Radio e Televisión de Galicia, S.A. en virtude das competencias e funcións atribuídas polo artigo 26 da Lei 9/2011, do 9 de novembro, dos medios públicos de comunicación audiovisual de Galicia, e polo artigo 22 dos estatutos sociais.

Ámbalas partes, recoñecéndose mutuamente capacidade xurídica abonda para a celebración do presente convenio de colaboración, acordan levalo a efecto e, a tal fin,



EXPOÑEN:

Primeiro:

Segundo o Decreto 167/2015, do 19 de novembro, polo que se establece a estrutura orgánica da Consellería de Medio Ambiente e Ordenación do Territorio (CMAOT) e o Decreto 116/2015, de 4 de outubro, polo que se modifica a estrutura orgánica da Xunta de Galicia, a CMAOT ten competencias para a xestión do sistema de observación e predición meteorolóxica de Galicia.

Para a xestión destas competencias conta dentro da súa estrutura orgánica coa Subdirección Xeral de Meteoroloxía e Cambio Climático (SXMCC), dependente da Secretaría Xeral de Calidade e Avaliación Ambiental (SXCAA).

Segundo:

A CMAOT fomenta que se difunda o máximo posible a información meteorolóxica e demais información deste tipo relativa a Galicia, elaborada pola SXMCC, nos medios de comunicación en xeral e concretamente no medio que intervéñ neste convenio.

Terceiro:

A Corporación Radio e Televisión de Galicia, S.A. está interesada na información sobre a predición meteorolóxica que a CMAOT elabora para Galicia así coma na información oceanográfica, que está elaborando actualmente, para divulgala publicamente nas emisións que realiza a través das súas canles de televisión e radio (Televisión de Galicia e Radio Galega), fundamentalmente nos seus espazos de carácter informativo.

Cuarto:



Ambas as dúas institucións conflúen no obxectivo común respecto da información meteorolóxica polo que parece conveniente establecer o presente convenio de colaboración para atender aos intereses das dúas partes.

Por canto antecede, ámbalas partes acordan subscribir o presente convenio de colaboración, que se rexerá polo especificado nas seguintes:

CLÁUSULAS:

Primeira.-

A Xunta de Galicia, a través da CMAOT, dispón de medios técnicos e medios humanos suficientes para a elaboración de prognósticos meteorolóxicos e demais información relacionada coa meteoroloxía.

A CMAOT colaborará coa Corporación Radio e Televisión de Galicia, S.A. adaptando os seus prognósticos e demais información para a súa comunicación pública por televisión e radio, en lingua galega.

Estas prestacións desenvolveranse co contido establecido nos Anexos que forman parte integrante deste convenio e serán realizadas os días do ano que dure o convenio.

Segunda.-

En relación con Televisión de Galicia está información comprenderá:

1. A preparación da predición meteorolóxica e oceanográfica para Galicia.
2. A elaboración de páxinas web especiais para o subministro continuo de datos de estacións meteorolóxicas e predicións por concellos.
3. Subministro de imaxes do satélite Meteosat cada 15 minutos.
4. Subministro de imaxes do radar meteorolóxico cada 10 minutos.



5. Outra información provinte das redes de observación (meteorolóxica, oceanográfica, rede de detección de raios, etc), da SXMCC.

Corporación Radio e Televisión de Galicia, S.A. comprométese a que Televisión de Galicia. conte cos medios humanos, materiais e audiovisuais necesarios para que a información facilitada pola CMOT sexa difundida nos espazos informativos de Televisión de Galicia que esta considere máis axeitados dentro da súa programación, citando fonte da información meteorolóxica en todos os soportes audiovisuais da mesma.

Ademais a CMAOT comprométese a impartir formación meteorolóxica aos profesionais da Televisión de Galicia que difundirán a información de MeteoGalicia e a aportar o equipamento necesario para que a descarga de información se poida realizar de forma automatizada dende os equipos de Televisión de Galicia. O alcance da formación, a periodicidade e a forma de impartila será acordada entre a CMAOT e a Corporación Radio e Televisión de Galicia, S.A.

Terceira.-

En relación coa Radio Galega:

1. Nos informativos e nos magazines ou programas, a información será referida a Galicia. Comprenderá a previsión do tempo do día, a previsión do tempo para as seguintes horas e datos de interese como temperaturas, chuvias, alertas , etc.
2. Nos informativos feitos en desconexión local referente á de A Coruña, Lugo, Ourense e Pontevedra, a información comprenderá a previsión do tempo para o día, a previsión das seguintes horas, así como datos de interese como temperaturas, chuvias, alertas, etc.
3. Na Radio Galega serán os profesionais de Meteogalicia os que telefonicamente ofreceran a información meteorolóxica nos diversos espazos informativos, ben en directo ou previa gravación das intervencións, sendo por conta da Radio Galega facilitar os medios técnicos necesarios para realizar as conexións. Sen prexuízo de



que as partes acorden outra periodicidade, de luns a venres, MeteoGalicia facilitará información meteorolóxica en cinco (5) magazins ou programas en quince (15) informativos referidos a Galicia e en cinco (5) informativos de desconexión local, cada un deles referido á de A Coruña, Lugo, Ourense e Pontevedra. Durante a fin de semana, MeteoGalicia facilitará información meteorolóxica en dous (2) informativos o sábado e en dous (2) informativos o domingo. En tódolos casos deberase citar a fonte da información meteorolóxica.

Cuarta.-

Establecese unha comisión de seguimento que estará formada por dúas persoas da CMAOT (a persoa titular da SXMCC e da Xefatura de Sección de Meteoroloxía e Oceanografía, ou persoas nas que eles deleguen), e unha persoa por parte da Corporación Radio e Televisión de Galicia, S.A. (o director xeral da Corporación Radio e Televisión de Galicia, S.A. ou persoa na que delegue).

Quinta.-

Corporación Radio e Televisión de Galicia, S.A. como compensación polos gastos nos que debe incorrer a Xunta de Galicia para realizar as actividades establecidas neste Convenio aboará 12.000 € (doce mil euros) máis a cota de IVE correspondente, a ingresar na conta corrente da Xunta de Galicia número: .

Esta cantidade será abonada en dous (2) pagamentos de 6.000 € (Seis mil euros), o primeiro o 15 de xuño de 2016, e o último o 15 de novembro de 2016.

Estas cantidades, serán facturadas pola CMAOT conforme á lexislación fiscal vixente, e serán abonadas pola Corporación Radio e Televisión de Galicia, S.A. de terse prestado en forma axeitada as actividades establecidas neste Convenio, durante o período facturado. A tal fin, deberá conformar as correspondentes facturas o directivo que designe a Corporación

Radio e Televisión de Galicia, S.A.

Esta proposta tramitarase con cargo ós orzamentos desta Comunidade Autónoma para o ano 2016 na que existe crédito axeitado e de abondo para dita finalidade.

Sexta.-

En relación coa información meteorolóxica a difundir pola Televisión de Galicia, a CMAOT outorga a Corporación Radio e Televisión de Galicia, S.A. a pertinente cesión de dereitos de transformación e de comunicación pública para que, logo do tratamento preciso por parte dos profesionais da Televisión de Galicia para que poda ser comprensible pola audiencia, divulgue a correspondente información facilitada nos programas da súa grella que teña por conveniente, calquera que sexa o sistema e modos de emisión empregados.

En relación coa información meteorolóxica a difundir a través da Radio Galega, a CMAOT outorga á Corporación Radio e Televisión de Galicia, S.A. o dereito de comunicación pública dos profesionais de MeteoGalicia, aos que se refire o punto terceiro da cláusula terceira do convenio.

O dereito de comunicación pública aquí referido, abrangue todas as súas formas, incluíndo expresamente a comunicación pública por televisión ou radio, en todo modo e sistema, por ondas terrestres, cable, satélite e emisión libre e codificada, así como a comunicación pública por medios de telecomunicación informática e todos os medios audiovisuais, para todo o mundo, e ata a súa entrada no dominio público polo tempo máximo establecido pola Lei de Propiedade Intelectual.

Non será responsabilidade da CMAOT os posibles erros que na comunicación da información meteorolóxica subministrada á Corporación Radio e Televisión de Galicia, S.A. puidera ter esta última.

Sétima.-

O presente convenio de colaboración iniciará a súa vixencia o día da súa sinatura e rematará o día 31 de decembro de 2016.

Oitava.-

Son causas de resolución do presente convenio de colaboración o incumprimento total ou parcial, por calquera das partes, dalgunha das cláusulas que o regulan; o mutuo acordo das partes ou, a denuncia de calquera das partes.

Calquera variación das cláusulas establecidas no presente convenio terase que consignar necesariamente por escrito, carecendo de toda eficacia ou validez ata o cumprimento deste requisito.

Novena.-

A Corporación Radio e Televisión de Galicia, S.A. declara coñecer o carácter de organismo administrativo que posúe a CMAOT e, consecuentemente, a aplicabilidade a esta das normas de dereito público. Calquera diverxencia que poida xurdir na interpretación e/ou aplicación das cláusulas do presente convenio de colaboración será sometida á xurisdición contencioso - administrativa.

E para que así conste, en proba de conformidade e previa a súa lectura, as partes asinan o presente convenio de colaboración por triplicado exemplar e a un só efecto no lugar e data “ut supra”.

Este documento foi efectivamente asinado polas partes con responsabilidade para elo.